

Undang-undang lebih baik ganti AUKU: PM

BH - 7/2/2020 m/s 4

Usaha selaras janji manifesto PH kembalikan kewibawaan universiti awam, pendidikan tinggi

Oleh Rafidah Mat Ruzki dan Noor Atiqah Sulaiman
bhnews@bh.com.my

Putrajaya: Kementerian Pendidikan giat melaksanakan usaha memansuhkan Akta Universiti dan Kolej Universiti 1971 (AUKU) dan menggantikannya dengan undang-undang lebih baik dan komprehensif, kata Tun Dr Mahathir Mohamad.

Perdana Menteri yang juga pegangku Menteri Pendidikan berkata, usaha itu selaras 50 Janji Kerajaan dalam manifesto Pakatan Harapan (PH) untuk mengembalikan kewibawaan universiti awam dan pendidikan tinggi.

"Akta baharu itu apabila berkuat kuasa kelak akan memberi penekanan kepada kualiti dan kecemerlangan universiti bagi mewujudkan institusi pengajian tinggi yang peka dan berupaya untuk bertindak balas dengan keperluan perubahan persekitaran," katanya ketika menyampaikan amanat kepada warga Kementerian Pendidikan di Pusat Konvensyen Antarabangsa Putrajaya (PICC), di sini, semalam.

Pada masa sama, Dr Mahathir berkata, bersesuaian dengan usa-

ha transformasi pendidikan tinggi negara, beliau berharap Majlis Pendidikan Tinggi Negara (MPTN) dapat diaktifkan semula untuk memantapkan sistem tabir urus dan pengharmonian Akta Pendidikan Tinggi baharu yang sedang digubal.

Dalam pada itu, Dr Mahathir berkata, sinergi ekosistem penyelidikan dan inovasi akan ditam-

bah baik pada tahun ini selaras dengan peruntukan RM400 juta yang disediakan untuk penyelidikan, bagi membolehkan universiti menghasilkan penyelidikan yang berimpak tinggi.

Beliau berkata, tumpuan seharusnya diberikan terhadap pengukuhan kolaborasi dengan institusi yang disenaraikan sebagai Top 100 di dunia oleh QS World University Rankings.

Dalam menggalakkan penyelidikan yang dipacu permintaan atau *demand driven*, katanya pelaksanaan *Public Private Research Network 2.0* (PPRN 2.0) dan *Prototype Research Grant Scheme* (PRGS 2.0) pada tahun ini akan memberi tumpuan terhadap penyelesaian masalah yang dihadapi perusahaan kecil dan sederhana (PKS) melalui bidang berasaskan teknologi.

Dr Mahathir juga berkata kementerian sudah membangunkan dokumen *Way Forward for Private Higher Education Institutions (PHEIs): Education as An Industry (2020-2025)* yang akan dilancarkan pada masa terdekat bagi menjadi sumber rujukan institusi pendidikan tinggi swasta (IPTs) dalam menentukan hala tuju menjelang 2025.

 **Akta baharu itu kelak akan memberi penekanan kepada kualiti dan kecemerlangan universiti bagi wujud institusi pengajian tinggi yang peka dan berupaya bertindak balas dengan keperluan perubahan persekitaran.**

Dr Mahathir Mohamad,
Perdana Menteri